

## **ASO LUA, 18 OKETOPA 2022**

*Na toe faaauau Taualumaga a le Fono Aoao i le itula e 3:00 i le afiafi.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoao Faitulafono.

Faamalo faafetai le lavapapale i le tatou Maota. E faataatiaese a tatou Taualumaga i le itula e 1:00 i le aoauli ua maea saunoaga a le Afioga i le Taitai o le Itu Agai ma le sui usufono mo Faleata 3.

Ia, o le avanoa lenei mo sui usufono mamalu e fia saunoa i le Lipoti a le Komiti o Tulaga Aloaia ma Amio Tualoa.

E i ai foi le talitonuga o le Fofoga Fetalai, e le o se mataupu fou e pei lava ona saunoa le Afioga i le Taitaifono. Sa sausi lava foi saunoaga a le tatou Maota i le mataupu lava lenei i le aso sa tagofia ai. Ia, o le agaga lena o le Nofoa. O lea foi ua uma ona fai atu le tala a le Nofoa e tai 10 tatou minute, ia a ua i ai foi le agaga o le Nofoa o le a felafuai. A maea le isi itu ona faapena lea ona felafuai i le isi itu, ia maua pea le toamalie ma le toafilemu o la outou tofa sasaa ma la outou faautaga aua lava le tatou faamoemoe o lenei aso. O le agaga lena o le Nofoa, ua ou manatu o le a felafuai le tatou felaugaaiga i le aso lenei aua lava le toamalie ma le filemu, ia ma le faaauauina o le tatou galuega.

Ia, ua i ai se manatu, o le avanoa lenei ua tuuina atu i le tatou Maota. Ia, o lea ua matau atu o lea ua fou mai le sa o le Afioga i le Sui Taitai o le Itu Agai. Lau Afioga i le Sui Taitai, o lou avanoa lenei.

**Tofa Hon LAUOFO FONOTOE NUAFESILI PIERRE LAUOFO:** E momoli atu le faafetai i lau Afioga i le Fofoga Fetalai ua maua se avanoa.

Ua tulaga ese foi lenei aso, a o se taeao na liugalua ua ese foi, pe a fua i le talafaasolopito o le Maota. Ae a le faafogafoga a Samoa?

E manatu o paia faaifogata o Samoa ua maea ona paepae ma tuulaupua. Ona manatu lea o le a fata ia i mauga o ao ma taoto faamaene o tai loloto paia apoapogata o le atunuu, ua maea foi ona sausaunoa i ai sui usufono mamalu o le Maota i lenei aso Fono. A ua maea foi ona manavaina e le Afioga i le Ositaulaga le upu o le ola i le taeao ua tea, o le gafa lava na sema i le lagi.

Ua maea foi ona fonofaapipii ma lagolagosua i ai lau Afioga i le Fofoga Fetalai i le taulaga sa osia. Ona manatu lea o lou sui usufono, o lea ua maea ona momoli lapalapa o malo, a ua maea foi ona molitai le puapua i fatulegae

ma malotumau e pei o le upu e fai i le la itulagi. Fai mai upu a le Afioga i le Ositaulaga, “O fanau a le Atua e e faatupuina le filemu. Amuia e e agamalu aua e fai le nuu mo latou tofi.” O le agaga tonu lena o le aso, aumai le filemu o Iesu e salani ai lo tatou aso ma le tatou taeao na liugalua. Ae fusia i le fealofani. O le agaga faakerisiano.

O le mataupu e pei ona saunoa le Afioga i le Taitai, ua nofo fale foi ia Satuiamaa e le o se mataupu fou. Ae faafetai foi i le saunoaga a le Afioga i le Taitai le Susuga ia Tuilaepa faapea foi le Tofa a Lealailepule. Ua taliga e fialogo mauga o Matautia, ua logo foi i tino matagi lelei. Faafetai i le tofa faatamalii, faafetai i le tofa faatupu. Ua faalogologo ma le totoa ma ua logo faa-Tutuila so o se tafa o Samoa ma atunuu e mamao, so o se Samoa po o fea lava le atunuu o le lalolagi o lo o maimoa ma faafogafoga mai ai, ua taoto le fautuaga a le Komiti, pei ona fofoga e le Afioga i le Taitaifono o le Komiti, faamalolo mo se 24 masina, 2 tausaga. A matau atu i ai, e le o se taimi puupuu, o se taimi umi, ma o se matatia foi lea ua tulai mai i le Maota o le atunuu.

A o le fesili pe mafua i se a? Ia e tofu lava tatou ma lagona, lea ua aumai le finagalo o le Komiti. E ui lava e toa-2 sui usufono e le i sainia le Lipoti, ia, a o lea e fulisia le tulaga e pei ona aumai ma faataoto mai ai. E manatu lau Afioga i le Fofoga Fetalai, pei lava o le masina o Me lea na fai ai le faaiuga na faamalolo le tumau ai sui usufono nei e 2, o le Taitai o le Itu Agai ma le Tofa ia Leala o le Failautusi foi o lenei foi Vaega Faaupufai. A faitau atu i ai masalo o lea ua 5 pe 6 masina, 6 masina e leai se totogi, 6 masina e le auai i fonotaga a le Maota, o le 6 foi lena o masina e leai se leo o itumalo ia e 2 i totonu o le Maota o Samoa i ana upufai o Malo. O itu ia e popoe i ai le taofi. A faaopoopo la i ai ma le 24 masina, o lona uiga ua 30 masina, 30 masina e toesea ai ma taofia ai mai le auai i fonotaga a le Maota. Ia, faatasi ai ma le leai o se totogi.

E manatu i le saunoaga a le Susuga ia Tuilaepa, o se saunoaga faooloolomaau sa faapea ai, ua tau le ta, 6 masina. A lea ua i ai ai o le tuuaiga po o le moliaga. E le ua lava lea? Ae fai lava le finagalo o le Maota. Sa manatu lau Afioga i le Fofoga Fetalai, ai o le faaiuga a le Faamasinoga e folasia i le Laulau a Fono se i soalaupule le Maota pe faasee i le Komiti po o se isi tulaga. Ui o lea, o le a le afaina lea manatu ma lea lagona ona o lea ua taoto le Lipoti a le Komiti i le Laulau a Fono. E manatu la, o lea ua aumai le iuga a le Faamasinoga, ua muta le faaiuga muamua po o le faasalaga muamua. A o se faasalaga faaauau po o se faasalaga faaopoopo. E pei o le fesili lea i lou mafaufau.

Ua uma le 6 masina. E le gata i lena, a o le tele foi o lafoga ma mea o saunoaga faalumaluma. E le faigofie i le faalogo, e le matagofie foi i le faafogofoga a nisi, aemaise foi lenei itu, faatasi ai ma le 6 masina, lea o le a toe faaopoopo ma le 24 masina. Ia, e pei lava ona ou taumafai atu lau Afioga i le Fofoga Fetalai i le isi tatou Fonotaga talu ai. Silasila i lenei taeao i le

matagofie o le tatou Fono faatasi, o se mea lelei o uso ae nonofo faatasi. A o upu foi a le Malelega i le taeao ua tea, e leai se tatou mea e maua i le fefulituaai ma le o i le Faamasinoga. O upu a le Malelega i le taeao ua tea. I lou taofi, e ese le manaia. O le faamalosiua foi a le Ositaulaga i le taeao, e manatu po o le a se tofa ae fai ni ai, fai ni ai o lea e tapuai le atunuu. Aua o lo o aveaveai lenei mataupu, ae o lo o tele nisi mataupu taua e tataua ona agai i ai le tatou Maota, ma le tatou Malo, ave i ai le faamuamua ma le faataua. Ae ui i lea, o lea ua matou matau atu, o le tulaga lena e pei ona i ai. Ae sa i ai le manatu o lou sui usufono e pei foi ona faaleo i le saunoaga a Leala, o le faatauaina o le sao foi a le Susuga ia Tuilaepa i le taitaiga foi o le atunuu ma le faigamalo i na foi tausaga ua tuanai. Amuia foi oe Tuilaepa ua tele lou aoga i le atunuu, tele lou aoga. Tatou te le iloa po o fea o taoto i ai le finagalo o le Atua i le isi 2 tausaga i le lumanai. Ae amuia oe, i lou talitonuga e leai lava se Samoa e le i oo i ai lou aoga. O la e silasila le Atua. Ae paga lea, sa ou manatu o lea ua i ai ai o le mataupu, ua lava ia taimi, o le a se tofa lau Afioga i le Taitai, ia o le matou tatalo lena. O se lapataiga, o se aoaiga i lenei aso, ia na ona matou tuualalo ma la matou tatalo, ae o lo o i ina i le Itu lena le malosi o le tatou Maota ona o lo o ia outou le fuainumera.

Ae pei o le matou tatalo lena i lenei aso lau Afioga i le Fofoga Fetalai o le Maota, e pei ona aumai ma saunoa malamalama foi le Afioga i le Taitai Komiti po o le Taitaifono o le Komiti i le faaiuga a le Faamasinoga, ia o la e fai mai le Faamasinoga i lau foi faitau atu, ia, atonu e i ai lava se finagalo o le Palemene e toe asiasi i le faasalaga, ae le o faapea mai i lau faitau e toe asiasi i le faasalaga. E ui o lea, ia ne i ese lou taofi ese foi lo outou finagalo, a o la e faitau le atunuu i le tulaga ua i ai lenei aso ma le tatou faamoemoe. E le faaumiumia sa matou faamatalaga, pe faamatafauloaina.

**FOFOGA FETALAI:** Ia, faauma mai le saunoaga ua maea le 10 minute o lou taimi.

**Tofa Hon LAUOFO FONOTOE NUAFESILI PIERRE LAUOFO:** O lea ua taoto atu le talosaga, o le a se tofa i ina? Ua lava ia taimi, tatou agai i luma, fau lo tatou Malo. E faapea se lagona.

Lau Afioga i le Fofoga Fetalai, ia agalelei mai le Atua, ia maua pea lou finagalo ma lou malosi aua le faafoeina o le Fonousu a Samoa. Ia maua foi le finagalo ma le malosi o le Afioga i le Tamaitai Palemia, Sui Palemia ma le Kapeneta, e faapena foi le aiga Minisita Lagolago. Ia, liua le vai o le tamaitai i lea Itu o le Maota, maua foi so latou finagalo aua le tauaveina o lo latou foi valaauina.

Lau Afioga i le Fofoga Fetalai, o se upu lena puupuu e faaleoina ai se lagona a lenei Itu ua fai ai au ma sui e momoli atu sa matou upu e lagolagosua ma fonofaapipii foi i le saunoaga a le Afioga i le Taitai ma le Susuga i le Failautusi o lenei Itu o le Maota.

Ia manuia le tatou Fono i lenei aso.

**FOFOGA FETALAI:** Ua faamalo saunoa, tanoa i lau Afioga i le Sui Taitai o le Itu Agai po o lau Afioga foi i le sui usufono mamalu o Anoamaa 2. Ia malo le tofa, faafetai foi mo le saunoaga e molimoli mai aua foi le tatou mataupu ua i luma nei o le Laulau a Fono. Malo faafetai mo le sao, o lea foi ua faafogafoga ma le totoa le paia o le Maota.

Ia, se i tulai mai lau Afioga i le Minisita mo Faatoaga ma Faigafaiva.

**Afioga Hon LAAULI LEUATEA POLATAIVAO FOSI (Minisita mo Faatoaga ma Faigafaiva):** Lau Afioga i le Fofoga Fetalai, ou te tulai ma le ava ma le faaloalo tele i le silamaimoa a le Palemene i lenei itula o le tauafiafi. Ua logo foi i Pulotu le mapu a Taii, ua logo foi le nai atea ua logo foi le nai ama, ma ua lologo foi Samoa i le iuleo o le tauafiafi nai Tiafau i lenei aso. Ona ou manatu lea lau Afioga i le Fofoga Fetalai, o le a ou le toe faloina le afaloloa, pe ou te toe toso le manoa, o lea ua tatala le avei, o le taeao ma le aso, na tatou sula ai le Atua ma Lona alofa faasalafa e aumai Lona filemu tatou te aafu ai ma lavalava i le taeao lenei. Ua tatou omai e loloma ma momoli lapalapa o malo e faapaia ma faatauto Le Ao Mamalu o le tatou Malo, o lea ua tatou tusiaao ua tatou filifili e tauave le tofiga o Le Ao Mamalu o le Malo.

O lenei ituaso, o lea ua tatou see mai i se tasi o mataupu ua logona ai le lalolagi atoa, le atunuu atoa i ona mamalu ma ona paia faale-Talalelei, i ona mamalu faaleaganuu, tainane ona mamalu faale-Malo, tainane le faafogafoga mai o le tapuaiga a Samoa i le lalolagi atoa po o fea le tafa o maua mai ai le Fonousu i le aso lenei. Ona manatu lea Samoa o le a ou le toe oo atu o lea ua uma ona faalagi ma faapo'i mamalu ma faalupe o le taeao ma le aso.

Faafetai i lau Afioga i le Taitaifono o lea ua opea i le Maota le tofa ma le faautautaga a le tatou Komiti, Komiti Filifili a le Palemene e silasila i le Lipoti ma Tualumaga ole mataupu lenei. O le a le toe oo foi sou leo i le tulaga o le tofa lea ua momoli mai ma la outou fautuaga e momoli mai e fulifulu faalaa'u mamafa i ai le tofa ma le faautautaga a le Fono Sili lenei a le atunuu.

Ae le i oo se upu i le mataupu lenei lau Afioga, tau lava ina ou faapoipoi vagana, leaga e faigata itumalo o le Susuga ia Tuilaepa ma le Tofa ia Lealailepule, o la e faafogafoga tapuai mai i lenei aso.

Tulouna ia le paia o le itumalo o Aufaga, Lepa ma Saleapaga. I le afio aua le paia o Aiga, afio mai Tupuola ma le Matua ia Tago, afio mai le falegafua, le faletolu o le usoalii, alaalatai Popo ma Talimao ma Salefao.

Afio mai oe Faaolotoi, Tauaa ma le Usoalii, Susu Alaalamalae, Lolofie o le Alo o le Tuiatua, Pualaga o le Alo o Mataafa, Tuilaepa o le Alo o le Malietoa. Alaalatai Fatialofa ma Auelua, Tama a Punefu o Tulauniu o Atua, alaalatai le Fetalaiga ia Malielegaoi ma le mamalu i le Faleatua ma Salefao.

Afio foi le tatou nuu i Saleapaga, afio o le Afioga ia Tuliaupupu, Falanaipupu ma Puletiuatoa ma Maopu Taulagi, afio mai Tupua o le Aloalii, Susu mai Sagale ma Sogimaletavai, alaalatai a lua fetalaiga ia Fiu ma Utaulu ma le mamalu ia te oe Salefao.

Le tatou nuu i Vaitele, susu mai Mataia o le Tama a le Fale, afio mai Galumalemana o le Aloalii, alaalatai Lealailepule, lau Tofa Toi, Tulaga ma Pula ma le mamalu ia te oe Vaitele.

Ou te oo atu ma lou agaga faaaloalo ma le agaga o le asuasua atu vaimalu i puega ona o tuleiga ma saunoaga o lea ua taatia i le Maota i le taeao ma le aso. E faigata o la outou Pule ma la outou faamalumalu ma la outou tofa o lea e saofafai ai sui usufono ia i totonu o le Maota Fono o Samoa.

Lau Afioga i le Fofoga Fetalai, e faavae i ina se lagona ma se manatu o lenei itumalo o Gagaifomauga 3, ma lo matou talitonuga i le taunuuga ua taunuu i ai le mataupu lenei lau Afioga i le Fofoga Fetalai. E tatalo i le Atua e foai mai le filemu, tatalo i le Atua e foai mai le tulaga sagatonu e taoto i ai se manatu o le itumalo lenei. Aisea? E auau le tavae i ona fulu ia Samoa ma lana tapuaiga.

Lau Afioga i le Fofoga Fetalai, o la e tapuai mai le atunuu o latou e ona le pule na tatou omai ai i inei e fai i tatou ma o latou sui e tautua, auuana, tavini ia Samoa ma le atunuu. Le faatuatuaga lena lau Afioga i le Fofoga Fetalai o lea e talii ae popoe i ai le manatu o lenei sui usufono. Aisea? Leaga o lea e pulapula mai fofoga o e na asaina le gasu o le taeao o le faigamalo ma le Palemene a Samoa. O le a le mea o le a tupu i le aso lenei? A manuia, saogalemu, viia le Alii. Ae afai ae manunu le toau nei, talofa e ia Samoa ma lana folauga mo a taeao. O lou sau i le Maota lenei lau Afioga i le Fofoga Fetalai, e le fai mo au, e i ai alo ma fanau o lou itumalo e mulimuli mai, e omai e tauave le Nofoa lea ou te saofai ai. A o le tapenaga nei ma le lumanai, ia malu le Nofoa o le Gagaifomauga 3 i le Palemene, ia taualoga, ia aloaia, ia faaaloaloga, ia tauave lona mamalu tumau tatou te omai ai e tauave upu o le Palemene o Samoa.

Le paia ma le mamalu o le tatou Maota Fono, na ona tatou toe tilotilo tasi lava po o a foliga o le a tatou savavali ai i le lumanai i le Fonousu Faitulafono a Samoa, o le Maota Faitulafono o le Malo o Samoa. Peitai, o lea ua tatou vaai i le taunuuga o le mataupu, ua le faa-1, le faa-2, lea ua faa-3 i inei ona aumai i le Maota. O le a le mea ua tupu? Ua faamaonia soligatulafono a sui usufono ia i totonu o le Palemene. Ua faamaonia. Ua faamaonia mai e le Faamasinoga, faamaonia e le Palemene, toe faamaonia e le Faamasinoga i le mea lea na ave nei. O le a la le fua faatatau lau Afioga i le Fofoga Fetalai i le manulauti ma le faavae o le Maota lenei? O le Maota Faitulafono o le Malo o Samoa. Fea e fua i luma fua i tua le mea lea ua tupu, tulou lau Afioga i le Fofoga Fetalai, e le i omai le itumalo lenei e aoi le tofa ma le faautautaga i le Maota Fono. E sa, leaga o tatou uma lava, o tulauniu na tatou omai e tauave le atunuu e fofoga finagalo, le tofa ma le faautautaga o itumalo taitasi.

Ae na ona ou faamanatu, ma ou tuitui malofie i le taunuuga e taunuu i ai le faamoemoe lenei mo taeao. Ua 60 tausaga talu ona tatou tutoatasi, na asa ai le gasu o le taeao e o tatou matua tatou te omai e fai le Faavae o le atunuu, tatou te omai e fai upu ina ia manuia le atunuu. Ae a tatou aafia loa i soligatulafono ona malie lea, ua tatau ona fai le mea e tatau ona fai. E le tau aoaia e Laupua Tamafaiga, o lena e i ina le tofa ma le faautautaga i sui usufono o lo o aafia. O lou gutu foi ma le afi, aua tatou te soo i le tino, e soo i le eleele, ma e u lava tau i le pau aiga. E le faa-aiga mea nei i le Maota o le atunuu. E tatau ona fai le mea tonu ma le mea sao ina ia filemu Samoa i le agaiga mo le lumanai i le faavae papa na fai e tatou matua o le Tulafono, the Rule of Law e taitai ai le Maota Fono o le atunuu lenei. Ma e le sili atu le sili ifo, ae tumu le agaga o le alofa.

Lau Afioga i le Fofoga Fetalai, ou te tulai ai lava au e faaleo le finagalo o lou itumalo, tulou Samoa ma lau faafogafoga, e le tatau, le tatau ona toe saofafai ni sui usufono i totonu o le Maota lenei ua faamaonia soligatulafono. O lau lea tautaulenuu lau Afioga i le Fofoga Fetalai, e manumanu, e manumanu i le atunuu, manumanu ia Samoa ma lana pule o la e tapuai mai. Silasila i le Maota? O tatou nei, o latou taeao. E omai e fai upu o le atunuu ma ia tatau pea le tatou Faavae i le moa o le ala ua uma ona lilifa i ai upu o le Faavae. O le a le Faavae? O le a le tatou tautoga na fai i le uluai taimi na tatou taunuu mai ai? Ou te tauto i le Atua e ou le malosi uma lava, o le a ou faamaoni ma tauaveina tonu le lotonuu faamaoni i le Malo Tutoatasi o Samoa ma amanaia Tulafono uma o le Maota. Ia fesoasoani mai le Alii mo tatou. E le fai ai sou loto le paia o le Maota, a o le tagi a le pumate, Samoa ne i vale tuulima lona tofi, a o lena ua silafia e sui usufono le mea e tatau ona fai. Silasila e 350 tagi na ou aafia ai, o le a lau mea na fai lau Afioga? Ou te le i toe faatafa, alofa, o le tulaga lea.

**FOFOGA FETALAI:** Ia faaiu mai le saunoaga a lau afioga, ua maea lou taimi.

**Susuga Hon LAAULI LEUATEA POLATAIVAO FOSI:** ia faapena foi faaiuga na fai i tulaga o le Palamene e tulai, ae na ona ou faapena atu. A fai e paopapa se tala a Gagaifomauga Nu. 3, foi mai i Aiga sa Tupua ma Aiga sa Malietoa ma le Aiga o Mavaega. A o matou moomooga faalupe o naumati na. Ia alofa maia le Atua i le feliliuiui o le tofa ma le faautautaga i lenei aso. A o upu faavae e fai ma pi matamata tetele i le Maota lenei, e lauga soo ai ia sui usufono. O le na te silafia le mea tonu ma le mea sao ae le faia, o le agasala lena i luma o le Atua.

Ia faamanuia le Atua i lau Afioga i le Fofoga Fetalai o le Fonousu a Samoa, faamanuia le tapuaiga a Samoa i lenei aso. Ma le faaaloalo.

**FOFOGA FETALAI:** Ia malo faafetai. Ia malo saunoa i lau Afioga i le sui mamalu. O lau Afioga i le Minisita o Faatoaga ma Faiga Faiva o le sui usufono foi o Gagaifomauga Nu 3. Ua malo le tanoa, malo saunoa.

Ia lafo atu i lea Itu o le tatou Maota.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, ou te tulai atu ma le agaga faaaloalo, ona o au lea e pei na fai ma sui o le matou Itu, ua maea a matou lauga.

**FOFOGA FETALAI:** O lea ua matau atu o lea ua maea lauga a le Itu lea. E i ai le talitonuga o lea Itu o le Maota...se i tulai mai lau Afioga i le Palemia.

**Afioga Hon Fiafe Naomi Mataafa:** Ia faafetai i lau afioga i le Fofoga Fetalai, atonu o lea ua manino le faaaliga a le sui Taitai a le Itu Agai e faapea ua fai ia ma sui o lena Itu o le Maota.

Lau Afioga i le Fofoga Fetalai, o le mataupu lenei, atonu i le tatou faigamalaga i mataupu ma matafaioi a le maota lenei. O lea ua tatou asaina le alavaa o le matafaioi o le faatonutonu, o tulaga taualoa ma amio a sui o le Maota lenei. Atonu e le tupu soo, a ua i ai taimi ua tupu ai. Sa i ai lou taofi faataitai o le Maota, taatia ia le taitai o le Vaega Faaupufai o le Faatuatua i le Atua Samoa ua tasi, o le avanoa lelei lenei, tatou te fale ai le Maota Fono o Samoa i le mataupu lea e faasino tonu ia i tatou o tatou tofi faipule e fai ma sui o itumalo. O ai e faatonutonaina lo tatou nonofo ai? O tatou, a le mafai ona manino o tatou alavaa i le tatou faafeagai ai i totonu o le Maota o Samoa ma taatia i se tulaga tatou te ave tutusa le faatauaina o le tulaga taualoa o le Palemene, ma Nofoa o itumalo. Ona ou manatu lea lau Afioga i le Fofoga Fetalai, o a uma isi a tatou galuega e fai, ae a le taoto i le agatonu le mea lea, e ono fesiligia po o fea le mea lea ua taatia ai le fai tofa ma le fai uta o faipule filifilia o le atunuu.

E ese lou taofi faataitai faavaega faaupufai lau Afioga i le Fofoga Fetalai, a i ai se isi o le Vaega Faaupufai e fia faaali sona finagalo i le mataupu lea, lo outou avanoa lea. A fai ua tasi le fingalo o lena Itu o le Maota ua tasi lo outou tootoo, o la outou aiatatau lea. Ae ou te fia faalogo lau Afioga i le Fofoga Fetalai, po o fea lea e taatia ai le tofa o le Maota lenei. E i ai lou taofi, ma a maua sou avanoa mulimuli ane, pe le fia saunoa nisi o lenei itu, ae ou te fia tuuina atu le avanoa e saunoa ai le faipule lava ia, e tauave lona fingalo aemaise o se finagalo o lona itumalo. Faafetai.

**FOFOGA FETALAI:** Ua faamalo tofa i lau Afioga i le Palemia, o le Taitai foi o le Maota. Ou te talitonu o lea ua faafogafofa ma le totoa le paia o le Maota aemaise o le faafogafofa a Samoa, i le tofa faaaliga. Ona o le agaga lava o lenei mataupu e le o se mataupu faigofie, aemaise foi o le faafesoai o le tofa ma le faautaga i le mamalu o le Maota. Ia malo tofa, o

lea ua maua lou finagalo, ina ia faapena ona faasoa pea la outou tofa ma saausi pea a outou saunoaga aua lava lenei mataupu.

Ia faafetai i lau afioga i le sui Taitai o lea ua maua le finagalo o lea Itu, a o lea ua outou faafofoga mai i le finagalo o le taitai o le Malo po o le Taitai o le Maota. Ia e manatu, ia aua ne i faataetaealuga lenei mataupu, ae ia saausi pea le tofa i taitai e limasefulutasi o itumalo ua tauaofia o le Palemene lenei, aua se faaiuga talafeagai mo lenei mataupu. Tatou te faamoemoe i le Atua i Lona fesoasoani mai, o le faasoa foi, ma le faautaga oo e fesoasoani foi le Atua i la outou tofa ma la outou faautaga aua le paepaega ma le agai i luma o lenei mataupu.

O lea ua saunoa le Taitai o le Malo, lea Itu o le Maota. Tulai mai le sui usufono mo Vaisigano Nu.1.

**Afioga NIUAVA ETI L. MALOLO (Vaisigano 1):** E faafetai i lau Afioga i le Fofoga Fetalai mo le avanoa. E manatu o taimi faapenei, e manatu ai foi o se tasi o Puleono, vaeane le tapuaiga Matia Matia Ituau, mataupu e tataua ona fai i ai se lagona o le itumalo. O le pule a Vaisigano o le pule e tausia le filemu. Ae faafetai i lau Afioga i le Fofoga Fetalai. Ou te maluai utufia ai le malu o le vai, o le tama e pei o upu e fai i le Anapapa. Na utumataua le vai faalele o le tamaitai, vai Malie ma vai Toelau ina ua tuta i nuu manaia le faatamasoaliiga sa i le atualii o le Faletolu. Ua lologo foi i Papafofo le lupe a Lafaiailii ina ua mua mua le aso e pei o le upu ia Tualemoso. E manatu o lea foi ua pae i pule le Maota, na i le Manuatele, o le Maota na maape ai tofiga o le Motusa. A o le taofi o le atu faleata, afai e soua le vai fuluasou, e sala lava ina sou. E sala ina sou aua o lo o toto ai tia o le maimoaga na i Faleata. A tapisa le aso, sala ina tapisa, sala ina tapisa aua o lea ua taoto le auau o peau, ua i liu o vaa le atusisi a le tautai, i le paia ma le mamalu maualuga o lenei aso.

E faafeiloai atu i lau Afioga i le Fofoga Fetalai, lau Afioga i le Tamaitai Palemia ma le Kapeneta, aemaise foi o faipule o le Maota Fono o Samoa.

E manatu o le a le toe ta i tua se tala. Lau Afioga i le Fofoga Fetalai, o le mataupu e pei ona toe lauliliu ai nei le tofa ma le faautautaga i le Palemene, o se mataupu e atagia ai pea le tausiga o le mamalu ma le aloaia o le va nonofo o le Tafatolu Tau Fefaatauagai pe a fua i le faaiuga o le Faamasinoga maualuga i le aso 30 Aokuso 2022. Aua a silasila lau afioga, o lea sa maea ona pasia e le Palemene le lipoti ma fautuaga a le Komiti o Tulaga Aloaia ma Amio Taualoa a le Palemene lenei i le aso 24 Me 2022, ma faamaonia ai e le Palemene, moliaga o le faalemigao i le Palemene, o sui usufono, aemaise o le solia o amio taualoa ma tulaga aloaia e pei ona faataoto mai totonu o le Tulafono Tumau. Sa pasia ai e le Palemene lenei o le faaiuga e faamalolo le tumau seia i ai se aso.

O le faaiuga lau Afioga i le Fofoga Fetalai, o le faaiuga a le Palemene atoa lenei. E le o se faiauga e na o lau afioga i le Fofoga Fetalai, e le o se faaiuga

a lenei itu ua tulai mai i le Malo. Ae o le faaiuga ua aofia uma ai sui usufono o le Palemene. Aepeitai lau afioga, o lea lava sa molituina e sui usufono nei lau Afioga i le Fofoga Fetalai, ma le Palemene le faaiuga a le Palemene atoa i le Faamasinoga, ma faapea mai ai, e solitulafono ma solifaavae le faaiuga a le Palemene ua fai nei e sui mamalu. E manatu o le a le afaina lea, ona o lo o faapea mai, o lo laua lea aiatatau e tusa ai ma le Tulafono Faavae.

Lau Afioga i le Fofoga Fetalai, o le faaiuga a le faamasinoga i le aso 30 Aokuso...

**FOFOGA FETALAI:** E fesoasoani atu lava i le sui usufono o lo o saunoa, ona o lea ua e taua le faaiuga a le faamasinoga ua solifaavae ma solitulafono le Palemene. E lelei le...e le o i ai se faaiuga faapena a le faamasinoga e tauleagaina ai le Palemene, ina ia fuafua i ai le saunoaga a le sui mamalu.

**Afioga NIUAVA ETI L. MALOLO:** Lau afioga i le Fofoga Fetalai, e faamalulu atu i le vaega lea. A o le tusitusiga a le faamasinoga maualuga, ua o latou lagolagoina ma faamaonia le faaiuga a le Palemene lenei sa faamaonia ai le soliiina e sui usufono nei, o amioga taualoa ma tulaga aloaia i le Palemene, aemaise ai lava le faaaliga o le faale-migao i le Palemene, contempt of Parliament.

Aua o lea ua faaalua manino le teena e le faamasinoga maualuga ia le tagi a i laua nei, e pei ona tuuina atu, e leai se mataupu i le tulaga aloaia, issue of privilege. E tusa ai ma le fautuaga tusitusia sa mafua ai lenei mataupu. A silasila i le parakalafa 59 o le faaiuga o le faamasinoga.

**FOFOGA FETALAI:** Ou te fautuaina le sui mamalu ina ia agai tonu i le faasalaga, e le o manaomia le auiliili o le faaiuga a le faamasinoga i totonu o le Palemene. Ia agai sao i le faasalaga lau lauga ina ia fuafua i ai lo tatou Maota.

**Afioga NIUAVA ETI L. MALOLO:** E faamalulu atu i lau Afioga. Ua tau talatala atu o se finagalo o lenei itumalo, e faamalulu atu i le vaega lea. O le a agai e faauma se lagona o lenei mataupu o lenei itumalo. I se manatu o lenei sui usufono, e fia faafetai ai i le Taitaifono, sa feagai ai ma le galuega faigata sa feagai, aemaise foi o le Komiti mamalu. E ui lava ina tilotilo foi ma le faanoanoa ona o le le sainia foi o nisi o sui mamalu, e manatu o lea lava o lo o taoto le aiatatau.

O le a toe agai la se manatu i tua, ae o le a tuuloa e tusa ai ma le lipoti a le Komiti o Tulaga Aloaia ma Amio Taualoa, e faatatau i le faasalaga, e pei ona tuuina mai i le Palemene, mo sui usufono nei. Ou te faafetai o lea ua mulimulitai i le taiala, ma le faasinoala e pei ona aumai e le faamasinoga. E faatatau i le tuuavanoa, o lea ua fofoga le Palemene ma Samoa, talofa e, o fesuluaiga o le alofa o le tino, e le mafai ona faaitiitia. I le mafutaga ma le

tautua a sui mamalu, i totonu o le atunuu ma le Palemene, e le tau faailoaina. Le susuga a Tuilaepa, aemaise foi le tofa ia Lealailepule. Ia malo le onosai, amuia oulua ua pine foi i lenei tausaga. E ui lava ina o se tulaga faigata, e manatu ua oulua masani i le sousou o le vasa.

Lau Afioga i le Fofoga Fetalai, a fua i lenei mataupu, o le uluai taimi lenei ua tulai mai ai se tulaga faapea i totonu o lenei Palemene, talu ona faalogologo mai ma le tuvae mai i totonu o Upufai o le Malo. Ma o se mataupu e le tatau ona tago faatumutumulima i ai le Palemene, o i tatou o sui filifilia mai o tatou itumalo, tatou te omai i le Palemene lenei, e saili ma faatino mea lelei uma aua le manuia o Samoa. E le i filifilia mai tatou e o tatou itumalo, tatou te omai ina ia fai ni amio le taupulea ma fai le faalemigao tulou, e leai. Na tatou omai o tatou o taitai o le atunuu. O le Palemene lenei e fau ai Tulafono e lima taitaiina ai Samoa.

O le a le uiga o ia upu? O lona uiga o i tatou o sui filifilia e o tatou itumalo, tatou te omai e fai le Tulafono e manuia ai Samoa. E le gata la o tatou e fauina ma pasiaina le Tulafono, ae tatau foi ona tau solomua ia i tatou o taitai o le atunuu ona mulimulitai ma usitaia ma aloaia Tulafono e pei ona tatou pasia. Ae aua le tausilimusa ia i tatou e soli le tulafono, e pei ona tatou pasia. Aua e le o se faailoga lelei lea mo le tapuaiga a Samoa, ma e le o se feau lelei foi lea mo tatou tagata, e tausolomua ona taitai ona soli ia tulafono latou te faia.

E manatu e le lelei foi i se vaai mai a atunuu mai malo i fafo. Ma e tau faatauvaaina ai ma aveesea ai le mamalu ma tulaga aloaia o le Palemene i le va i fafo.

**FOFOGA FETALAI:** Ia faamaea mai le saunoaga a le sui usufono ua maea lou taimi.

**Afioga NIUAVA ETI L. MALOLO:** O le faaiuga tatou te faia i le Palemene lenei, e tautala i le Palemene a taeao. Aua tatou te tuufauina le sese e alu loa. Aua foi tatou te nanaina le mea mataga i le pogisa. Aua tatou te lafoina uiga le migao i nuu le aina. Ae tatou faia se faaiuga mo le lelei o le atunuu i ona upufai, aua e Tautalaaso le igoa ipu o le itulagi lea.

Lau Afioga i le Fofoga Fetalai, e lagolagoina ai e lenei sui usufono ma lenei itumalo, le lipoti ma le fautuaga a le Komiti o Tulaga Aloaia ma Amio Taualoa.

Manuia le Fono.

**FOFOGA FETALAI:** Ua faamalo saunoa i le sui mamalu mo Vaisigano 1. E faamalulu atu foi i le sui ona o le fai ma taofi atu le saunoaga. Ona o le itu lea, ia tatou aloalosa foi i le tulaga o le faaiuga a le faamasinoga, o lea ua mafua ai lenei mataupu ma e i ai mafuaaga. O le mea lea, atonu e fesoasoani

foi i nisi o sui mamalu, ina ne i safua foi i se saunoaga, o le agaga lena o le Nofoa. Ia tatou agai pea i le tulaga o le faasalaga ua i ai le faamoemoe.

Ua ou manatu ona o lea faatoa maea atu Savaii, o lea o le a tuu atu le avanoa ia Lefaga ma Faleaseela. Tulai mai le sui mamalu.

**Afioga MASINALUPE MAKESI MASINALUPE (Lefaga ma Faleaseela):** Faafetai i lau Afioga i le Fofoga Fetalai mo le avanoa. A o ee papaaao pea le paia maualuga o le Fonousu. E muamua ona ou taia le toatavai e pei o le fetalaiga i le taotolima a Galumalemana. Ma ou faapoipoi lilia e pei o le fetalaiga i le malae o tupu. Ma ou siitia faavae o maota aua uluulu o laau na i Gagamoe. Ou te ta foi le liu o le sa na i Futuna nei le mateia le tupua na i le siu o Avamua. Ua falailupe le taeao ina ua tafa ata o Taulelei, aua ua le o se taatuimalae, po o se tofa le auga faaalualuo le fesilafaiga i lenei taeao. Ua le toe tu se ola aua o lele ua suafuefue le tai, i le alofa le faatuaoia o le tatou Tapaau sili i le lagi.

O lenei taeao na liugalua aua le alalatai o le paia o le Palemene, i le afio o le afioga i le Palemia, le afioga i le Saofaapito, afio foi lau Afioga i le Fofoga Fetalai, faapea Minisita o le Kapeneta ma le mamalu o sui faipule.

Ou te manatu o le a vili tonu le ifi o Maina ma fagatonu le malama e tusa ai o le mataupu ua feagai ai i lenei foi ituaso. Ou te tomanatu lava i tulaga e faagasolo ai ia ni sui tauva. E le mafai ona e tauva pe a fai ua faamaonia sau solitulafono. O le agaga lena e taumolimoli. Ona tupu ae ai lea o le fesili. O le a le ituaiga Palemene e i ai se Palemene ae o lo o i ai nisi o lo o ua faamaonia solitulafono? O lou lava talitonuga o lou sui usufono, e avea ai lou leo e fai ma fofoga taumolimoli o le aiga sa Tuala ma le matua, afio le Taulagi ae tainane le mamalu o faleupolu, Gagaeolo ma Leitu, le mamalu o le Faleuisavailuu tainane Faleaana ma polo e fa, le tootoo o Maauga ma Nuuausala.

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai se avanoa faamolemole.

**FOFOGA FETALAI:** Ia malie lava le sui mamalu... e i ai se mataupu....

**Afioga Hon Lautafi Fio Selafi Purcell:** Ua ou tulai atu lau afioga, ona o le tatou Tulafono Tumau, a aumai le lipoti a le Komiti faa-Palemene e ui mai i le Taitaifono. Seia vagana la ua leai le Taitaifono, ona faataga lea o se isi sui o le Komiti e talanoa i le lipoti. Ona o lea e faalogo atu, o le sui lava, o Masinalupe o le sui o le matou Komiti.

**FOFOGA FETALAI:** Faafetai faamanatu i lau afioga i le sui mamalu o Satupaitea. O le tulaga foi lena e faamalulu atu foi i le paia o le Maota ua le maua e le Nofoa le tulaga lea e i ai lau afioga o le sui o le Komiti. O le mea

lena o lea ua maua atu, ma ua manatu foi, ona ua saunoa le afioga i le Palemia, o lea ua tatala. E pei o le mafuaaga lena o lea ua tau i ai se fetuunaiga faapena a le Nofoa, ona o le saunoaga a le Taitai o le Maota, ona ua leai foi nisi o le la Itu e faaali ni tou finagalo. Atonu e aoga foi finagalo faaalua o sui e fesoasoani i le tatou mataupu ma le faasalaga. E faamalulu atu foi i le paia o le Maota, ona o lea ua laaloa le vaai a le Nofoa i le tulaga lea. O le mea lea e faamalulu atu ai, e sao le sui mamalu mai Satupaitea. Ae ua i ai le manatu lau Afioga i le sui mamalu, o le a se tofa o lau afioga o lo o saunoa? O le puipuiga lava o le tatou Maota ma tatou Tulafono Tumau.

**Afioga MASINALUPE MAKESI MASINALUPE:** E ava lava ma faaloalo i lau afioga i le Fofoga Fetalai, ona e foliga ona o au sa fai lou manatu i le taimi e le i alu le matou faigamalaga. Ona o lea lava e tau tulituli atu le tulaga e pei ona sa i ai foi se taofi i le tulaga i le aso lea na filifili ai. E faatulou atu foi i le afioga i le Taitaifono. A fai lava o le a le finagalo o lau afioga.

**FOFOGA FETALAI:** Ioe o tatou o sui mamalu o le atunuu, e ao foi ona tatou felagolagomai. O le a lava se mea, ona o lea ua saunoa le Taitaifono, o lea foi ua uma ona saina lau Afioga i le lipoti, e talitonu foi o lou tulaga atoatoa lea ua i le Taitaifono. O le ala lena e faamalulu atu ai ma faamalie atu ai i le sui mamalu. Ia faagasolo pea le tatou galuega, atonu se i saunoa foi le Taitaifono e toe maua ai le isi avanoa o le tou Komiti. O le agaga faaloalo lea e faamalulu atua i i lau afioga i le sui mamalu.

**Afioga MASINALUPE MAKESI MASINALUPE:** E faamalulu i lo matou itumalo, ua le maea le lauga a Lefaga ma Faleaseela, ae ou te talitonu o lea foi ua malie le fugalua, ua malie foi le loto e tusa ai ma le faamoemoe i lenei aso. Ia alofa mai le Atua ia maua pea le tatou fealofaniga, ia tatou savavali i le amiotonu. Ia manuia le Fono.

**FOFOGA FETALAI:** Malo faafetai, faafetai foi i lou finagalo malamalama lau afioga i le sui usufono mamalu. Ua faamalo foi le fesoasoani mai i galuega a le Nofoa. Se i tulai mai lava le sui usufono mo Salega Nu. 1.

**Afioga FEPULEAI FAASAVALU FAIMATA SUA (Salega 1):** E faafetai i lau Afioga i le Fofoga Fetalai mo le avanoa, ua maua foi se avanoa o lenei usufono mai Salafai, e faaali foi se lagona i lenei mataupu. Sa naunau lava ou te fia muamua atu i le amataga, ua ou manatu foi i lou tulaga i le itumalo, leaga o Lega o le tamaitai, o le pae ma le auli i se isi itu. E fesoasoani foi i matapu toatuga faapenei.

E manatu lea o lou olioli ua fai ma faanoanoaga i lou loto. Aua ua alalaga tama fafine o lou nuu mai nuu mamao, pe le o i ai ea le Atua i Siona? Ua leai ea ni pusama i Kiriata? Ua le o i ai ea se leo o se fomai? O le taimi umi o lenei mataupu mai lava i le amataga. E i ai le upu a lo tatou atunuu na ou faalogo i ai. E taialalo le ia a le aiga a Sa Saumani mai le itu o le Alataua. O le fesili, o le a le umi na taialalo ai le ia? E manatu o lea ua oo le tosogaia i lou itumalo, aua o i lea na toso ai le ia lea. Na fai mai le tala a le tama, se i siaki le ia po o ola. Ona tago lea o le tama ua faamafiti i luga laumata o le ia, fai mai, a lea e ola, o lea e enaena mata o le ia. E oo mai i le taimi lenei, o lea e igoa le eleele lea o lou itumalo o Mataenaena, o lo o soifua le ia. Ona ua umi ona toso atu i lalo le taiga o le ia a le aiga a Sa Saumani.

O le ata o le mataupu lea, ua lata ina mou atu le soifua o le ia, po o le malosai o le ia. E faapena sou lagona, i le umi ona taialalo o le ia a Sa Saumani i lenei mataupu. E leai se tala, leai se leo, onosai, a o lea ua toe oo mai i totonu o le Maota Fono.

E faafetai i le Komiti lau Afioga i le Taitaifono ma lau komiti mamalu, i le feliiuaina o laina ma vailaina o lenei mataupu. E ui lava ina le atoa le saina, ae le taua ia te au le saina. Aua ou te iloa o la e i ai i totonu manatu o le au le saina i totonu o le mataupu lea. Pe saina pe le saina, ua uma ona sasaa le tofa a itumalo, na afifio mai ai faipule ia.

O le toe asia o le faasalaga, ma le toe fetuutuunaiga o le faasalaga, 3 tausaga po o le 36 masina i le 2 tausaga. Ae aumai la outou mau ua uma le 3 masina, o le soifuaga tautua ma le faatoesega. Ae i lau faitau i le lipoti, e leai se upu faatoese po o se agaga loto maualalo o sui usufono ia i la outou Komiti. Lau Afioga i le Taitaifono, o la outou Komiti, o le mamalu lava lea o le Palemene o Samoa.

O lea foi na maua i le taeao lenei saunoaga a sui usufono. Ia, tulou Tuilaepa, o oe o se tama ua aoga, tauaogaina. Matou te le fai atu foi ona o ni mea ua tutupu. O upu a le atunuu e mau e matau mau e faalele. Afai e te saunoa ma e malele, matou te matau ma matou faitau. A matou talanoa, e te maitauina uiga o a matou upu. E leai ma se agaga faatoese o Tuilaepa i le Maota lenei i lana saunoaga i le taeao lenei. E leai se agaga faamaualalo. So o se tagata sese lava, e tataua ona faamaualalo. Afai o au o le sui usufono ae ou solitulafono, o le a lau mea e fai? Ou te tolotolo atu i lalo, leaga ou te saofai i le faiganuu o au o le matai Samoa. A ou faia le Tulafono, e le aoga ona ou toe solia le Tulafono. O le ala lea o lou fai atu i le amataga, ua liua lou olioli e fai ma ou faanoanoaga, ua lagona i ou taliga le tagi o tama fafine a lou itumalo mai fafo ma Samoa nei. Fepuleai, o le a lau mea e fai i le Nofoa o le itumalo? Faaali o matou lagona. Le tatou itumalo, afai o e silasila ma e vaai mai, o Fepuleai lea, lea ua ou tu e ave lou manatu ma lou lagona. Talofa! O le a se silasila mai a lou itumalo i le Palemene ae nonofo tagata solitulafono? Afai ua soli le Faavae, tatou te o pea i le mea lea? Fofa a alamea. O se Faavae alamea le tatou Faavae? Lona uiga o le a aveese le Faavae ae fofa i le

alamea? Talofa e! Talofa e ia Samoa ma lana Palemene! Fai mai upu o le Tusi, o mataupu ogaoga Samoa e fofo alamea. Upu o le Tusi lea na aumai. Ae a outou silasila i le Lipoti lea na aumai, e tasi le tusi, lua pagota ae sainsi uma i le tusi lea e tasi. Tulou le upu ua ou taua o le pagota leaga o le tagata o lea e sese. E le talafeagai pe afai o au o se sui o le Komiti, e 2 tagata solitulafono ae tasi le la tusi e aumai e sainsi uma ai. Conflict of interest, e le fetai, e le talafeagai. Fau manatu faatasi ae omai e momoli mai le Komiti. E le talafeagai i lou sui usufono lea mea. Ia, le tatou Palemene, alolofa maia, ou te le alu ese ma le faaiuga lau Afioga i le Taitaifono, ou te tu pea ou te lagolagoina le sala a le tagata ua soli le Tulafono. Afai ua soli e le itumalo o Salega le Tulafono, ia e tataua ona ou savali, e tataua ona ou faamaualalo ma ou faatoese.

Ona faapea lea o se upu, o le ala lea o lou fai atu, e susue atu laumata o le i'a ua enaena, o le ata lea o le a ui le mai, o le a uma le soifua o le i'a. E faapefea ona toe faaola, faasaosao o tatou ala i le Atua. Faasaosao auala o le tatou Palemene. Afai e solitulafono lou nofoa, tuu le nofoa e le o se nofoa o oe Fepuleai, o le nofoa, o le nofoa o Salega.

O le ala lea ou te tulai atu ai e faaleo se agaga o lenei itumalo, ou te lagolagoina le faaiuga a le Komiti Filifilia a le Palemene. Manuia le Fono.

**FOFOGA FETALAI:** Faafetai ua maua. Ia, o lea ua maua le finagalo o Salega 1. Malo faafetai.

Ia, o le avanoa lenei. Ia, o lea ua matau atu ua leai nisi e fia saunoa, atonu o le avanoa lenei o lau Afioga. Ia, se i tuu atu muamua la le avanoa i le Afioga i le Sui Palemia.

**Afioga Hon TUALA TEVAGA IOSEFO PONIFASIO (Sui Palemia):** Lau Afioga i le Fofoga Fetai ma le paia maualuga o le Maota Fono, ou te muai faatulou i ona tulaga faalupe i lenei itula o le aso. Ou te toe fia pai i le viiga o le Atua i lenei itula, e ao pea ona tatou manatua ma pipii pea i lana taiala mo le tatou usugafono.

Ou te faafetaia lau Afioga i le Tamaitai Palemia, sa faapea o le a le maua se isi avanoa e fai atu ai se vaivaiga po o se faamatalaga tau lava ina ou faapai le mataupu lenei, ona e manatu ona o au lea na amataina le mataupu. E ao pea ona avatu se faamatalaga, o lea foi ua tofua saunoa le toatele foi o le Maota i lenei aso, atonu e talafeauga se tala o le a avatu ma le tulaga foi o lo o taoto i ai le finagalo o le Komiti aemaise foi le tatou Palemene mamalu. E i ai le tala masani a le tatou atunuu e fai i le talafatai o le tai e faapea, e tutupu matagi i liu o vaa. A soua matagi ona faaoga lea o le la afa, ae a fisaga matagi ona faaoga lea o le la fala. Ae a pe le matagi ua leai se savili, o le a la le la o le a faaoga? Ae fai mai e i ai le tautai mataala na te toe sisi lava le la, aua fai mai lona manatu, e i ai lava asuasua o matagi, e i ai lava nai toe matagi e mafai ona tatou folau ai.

Ae paga lea, sa ou faapea o lea. Sa ou faapea o nai toe matagi nei o le a tatou folau ai i le aso, o toe matagi po o le toe avanoa foi lea o le a folau ai sa, ae peitai, ua le mafai e le tautai ona faatila le sa lea. Ae o le a tatou alu ai pea faatafetafea ai faapea i luga o au.

O lau faamatalaga e faamalulu atu lava i sui usufono o lo o aafia, ae o le aso sa faapea e le avatua sau faamatalaga ona ou te manumanu lava i le tatou va ona o au lea na faaulua le tagi. E tasi lava le mea na ou fia faalogo i ai i le aso, e tasi lava le mea na ou fia faalogo i ai, lau Susuga i le Tuilaepa, sa ou fia faalogo i sau tuualalo po o sau faamaualaloga i le aso, sau toe tatalo mai, ioe, pe e te faatoese mai foi. Ae soia ia, pei ona ou fai atu, o lea lava ua finagalo le tautai tatou te o faatafetafea ai pea faapea. Ae faafetai i le Komiti i le faatonutonufolau aua le Palemene o Samoa, o le lumanai. O lea ua tuuina mai le fua, ua ou talia le fua, a lua Afioga i sui usufono mamalu o lo o aafia i lenei mataupu, ia maua lo oulua lototele, e sau malama. A faanoanoa nei, tatou te fiafia taeao, a tatou tagi nei, e ata taeao.

O le mau a fitafita o le militeri e faapea, a faatulaga se savali, e tatau lava ona sao lau laa muamua. Aua a sese lau laa muamua, e sese atoa ai lava le savali ma tagata o lo o mulimuli mai ou tua. E te toe fiu lava e faasao ua sese, ua mataga.

Lau Afioga i le Fofoga Fetalai, aemaise foi le Taitaifono, a sao le tatou faaiuga i le aso, o le sao foi lea o le tatou folauga, aua alo ma fanau o le tatou autnuu o lo o fai mai, aua nisi taitai e pei o tatou e ofi mai totonu o le Maota lenei i ni tausaga o le a sau. E pei ona ou fai atu, ou te le o toe tulai o nisi tulaga, tau lava ina faaleo sou lagona i le faaiuga ua tuuina mai e le Taitaifono ma le Komiti mamalu. Ia e le toe faasalaese se lagona. Faafetai i sui usufono ua aafia. Malo le faatamalii. E pei ona saunoa le sui usufono o Lepa po o le tama foi ia Tuilaepa, o le maualuga o le Palemene e le milimilia faauu upu o le Fono, aua e taofimau le tagata e eseese o tatou lagona, e eseese foi o tatou talitonuga. E i ai foi le manatu a tonu uta, sala tai. A tonu foi tai, sala uta.

Ou te faamalulu atu i sui usufono ia, e leai se pona i lo tatou va, e leai foi so tatou vevesi, ae o le fatu o le mafuaaga o nei mea, o se manuia o Samoa. Ia alofagia e le Atua a lua Afioga, ia maua la oulua tofa, maua le malosi o le tino, ia i ai le filemu o le Atua i o oulua soifua faaleagaga. Ia i ai se taimi, sau se aso tatou toe fesilafai i le Maota nei i Tiafau aua upu a lo tatou atunuu. Lau Afioga i le Fofoga Fetalai, faafetai mo lou avanoa. Manuia le Fono.

**FOFOGA FETALAI:** Faafetai. Malo saunoa i lau Afioga i le Sui Palemia. Ia, ua faafofoga foi le paia o le Maota, aemaise foi o lea sa e saunoa tonu lava i le faapogai foi o lenei mataupu. Malo le tofa. Ua i ai foi le manatu, o lea foi ua fou mai le sa o le Afioga i le Tamaitai Palemia mo lana saunoaga, sooa ai foi le saunoaga a lau Afioga i le Sui Palemia.

**Afioga Hon FIAME NAOMI MATAAFA:** Faafetai i lau Afioga i le Fofoga Fetalai mo le avanoa. Ou te tulai atu i le ava tele e tatau ai e faapena ona faaopoopo atu foi i le tatou faasoa i le mataupu ua i le Laulau a Fono a le Palemene.

Lau Afioga i le Fofoga Fetalai, ou te manatu ona o le taimi foi ua faaavanoa, o le a tuusao se taofi, o se taofi o le itumalo, a o se lagona foi i le tulaga faa-Taitai.

Ou te faafetai atu i le Afioga i le Taitaifono ma sui usufono mamalu o le Komiti sa feagai ma lenei mataupu, aemaise o le faalua lea ona toe foi mai o le tatou mataupu i le Maota nei. Faafetai ona ua tali foi i le toe taatia atu o lenei mataupu e faapea ona fau ai se fautuaga mo le Maota.

Ia o le Lipoti e manino, ma ua fofoga foi le Maota. Ua faafofoga le Maota i saunoaga a le Susuga ia Tuilaepa, le afioga i le sui usufono o le itumalo o Lepa, ua faapea foi le saunoaga a le sui usufono o le itumalo o Faleata 3 le Tofa ia Lealailepule. O saunoaga ia sa autu i ai le toe foi mai o le mataupu leni i totonu o le Maota, i le tulaga ia mau avanoa e tautalagia le faasalaga. O lea la ua faatino le toa na aliali mai i le faaiuga a le Faamasinoga, Natural Justice i le faasologa o ala o mea, e tatau ona i ai se mau a le ua molia, i sona faasalaga. O lea la ua tino i le taeao leni.

O le mataupu foi e pei ona sa ou tautala i ai lau Afioga i le Fofoga Fetalai i lou uluai tulai atu i le mataupu leni, o mataupu nei e fitoitonu i le tofi o le sui usufono ma le tatou galuega faatino i totonu o le Maota. Ma e leai lava nisi e faatonutonuina le Maota leni i le amio a le sui usufono o le Maota lava ma le faatautaiga a lau Afioga i le Fofoga Fetalai.

O lona uiga o lau faamatalaga, o le pulea ma le pulea lelei ma le pulea ma le amiotonu ma le tatou tausii o le mamalu o le Maota o Samoa, e le faia lava e nisi, e fai e tatou. Ma o se tiute tauave i lou taofi e tatau ona ave i ai le faamuamua ma le faataua e so o se sui usufono.

Lau Afioga i le Fofoga Fetalai, e le toe foi le faamatalaga i tua i le mataupu, ua uma ona iloilo e le Komiti, ua faamaonia moliaga i le mataupu o le solia o tulaga aloaia o le Palemene. E ao ona ou fai atu se faamatalaga e tusa ma saunoaga a sui usufono mamalu ua faasino i ai nei moliaga ma ua faamaonia le solitulafono.

Na ou matau ma le totoa i le saunoaga a le Afioga i le sui usufono mamalu o Lepa ma lona finagalo, maimau e le avatu o mataupu a le Maota leni i o i le Faamasinoga. Ona faapea mai lea, a o fea ea o le a tua i ai? O fea ea tatou te tua i ai? O le Tulafono, o le Faavae lea o le Malo Tutoatasi o Samoa. Ma o le Maota le la, o le Faamasinoga, tatou te tua uma i ai. E oo lava i totonu o le Palemene lea, ma ua tele pine o le avatu o mataupu a le Palemene leni i o i le Faamasinoga. Ona o le a? O le Faavae lea o le tatou Malo o le Tulafono, a o le Faamasinoga e maua mai ai le tali, pe a ua le faamalieina ni mataupu i itutino eseese o le Malo. E le fou le ave o le mataupu a lau Susuga Tuilaepa ma lau Tofa Leala o sui usufono o le Palemene leni i le Maota le

la. E fia sui usufono ua oo i o a latou mataupu? E leai la se eseesege ma le mataupu lenei. Pau lava lea, ona o tulaga aloaia ma le tausia o le mamalu, o lea ua aumai le tuualalo a le Faamasinoga i le latou pitolaau, tausisi i le Tulafono, avanoa o tagata ma latou puipuiga o le aiatatau. O le a le tali a le Palemene? O lea ua tatou faia i le faiga lenei, toe faafoi mai le mataupu, toe iloilo, o lea ua le gata ina uia ala o mea ma amanaia aiatatau a e ua molia, a ua toe matimati ma toe poupou le fua o faasalaga o soligatulafono e faasino i tulaga taualoa o le Palemene. E aoga le mea lea ua tupu, o lea ua savali i le mataupu lea i le tatou faigamalaga o sui usufono, pe faapefea ona faatautai le tatou galuega faa-sui usufono ma tatou tausia le mamalu o le Palemene o Samoa.

O le isi itu na ou maua i le saunoaga a le Susuga ia Tuilaepa, o le aiatatau a le tagata e tautala, saunoa, fetalai i lona lava finagalo, freedom of speech. Ma na ou maua o se finauga foi lea sa ave i le mataupu o le moliaga o le Contempt of Court, e i ai i le tagata soifua le aiatatau e saunoa, fetalai, tautala i le mea o lo o i ai lona finagalo.

Lau Afioga i le Fofoga Fetalai, i le mataupu lava lea e faasino i tulaga taualoa o le Palemene, e leai lava se mea e leai sona tuaoi, e oo lava i le mea lea e tau o le freedom of speech, aemaise i lou taofi pe a ua saunoa se sui usufono o se tagata faitulafono e faapea o le Faamasinoga e faapea ma faapea, o le Palemene e faapea ma faapea, ona tataua lea ona i ai le fua o le mea e oo i ai le tautalagia o le taofi ma le manatu o le tagata, aemaise o le tagata e faitulafono, ae fai le saunoaga e fai ai faaiuga a le Faamasinoga, po o tulaga aloaia o le Palemene lea e fau atu ai a tatou Tulafono.

Ma e o le tulaga lea lau Afioga i le Fofoga Fetalai, lea lava e taumafai e momoli atu i le Maota lenei. E leai se saolotoga ia tatou e fai ai o tatou loto. O le tofi, o le galuega, e pa puipui e le Tulafono. A solomua ia tatou ona tatou solia Tulafono ma faia amioga e atagia ai lo tatou le aloaia o Tulafono, o le a le aoga o le tofi lenei?

Lau Afioga i le Fofoga Fetalai, o le Afioga i le sui usufono o Faleata 3, e moni na aumai le faatoesega a Leala i le tatou feiloaiga muamua i le mataupu lenei, ma ou te iloa na talia lelei lava e le Maota. O lea ua tatou maua i le aso lenei, o lea foi ua faamalulu le Afioga i le sui usufono i lona itumalo. O le mea o lo o atagia mai i le tatou mataupu lenei, o le a tatou see ese i le autu o le mataupu, o amio a sui usufono e solia ai tulaga taualoa. Pei o le a tatou talanoa i le tausii o le filemu, lo tatou vafealoai, ae taatia le fatu ma le autu o le tatou mataupu lenei.

O le isi foi mea ua aliae mai i saunoaga i lenei aso, aemaise o le tulai mai o le Sui Taitai o le Vaega Faaupufai, ua lanu le tatou mataupu i le lanu faapolokiki, ua lanu i le Vaega Faaupufai. Lau Afioga i le Fofoga Fetalai, ia atonu o lea tatou te malamalama foi i ai i lea tulaga. Ae sa maualuga le faamoemoe o lo o lava se lagona o lo o i ai i a outou Afioga i sui usufono e

mafai ona tatou faafesagai lelei ai ma tatou fai a tatou upu ma tala i uiga ma auala tatou te galulue faatasi ai.

Ua aumai foi le finagalo o le Sui Taitai o le Vaega e Agaia le Malo, e laualuga le agaga o le filemu ma le fealofani. Ia, ailoga e i ai se isi o tatou e le moomia lea tulaga o le filemu ma le fealofani? Ae i lou lava taofi faa-Taitai lau Afioga i le Fofoga Fetalai ma le mamalu o le Palemene, a le mafai ona faamaoni lo tatou tausia o le mamalu o le Maota lenei, ma auala tatou te galulue faatasi ai, e le moni lena uiga o le filemu ma le fealofani. O lona uiga, e tau faamolemole mea ua galua, o le tanu o mea e faaletonu. E i ai nisi o saunoaga, o mea e tutupu i le pogisa. Ae o le filemu ma le faamaoni o tulaga e manino ma e malamalama.

Ou matauina foi i le saunoaga a le Sui Taitai, e momoli mai lava le saunoaga i upu e tuaiina, moliaga. E leai se upu e tautalagia le mea e tau o le solitulafono. O le autu ma le taunuuga lena o lenei taamilosaga umi ua fai i totonu o le Palemene lenei. Ioe, tuuaiga, moliaga, fai le suesuega, maua le tonu, faamaonia le solitulafono.

Lau afioga i le Fofoga Fetalai, fea le amiotonu? Pe a tatou le amanaia le solitulafono? O ai e faasala i le solitulafono? A o ai e faamagalogo? E ese le tatou fua e fai mo tatou, ese le fua o le mea e feagai ma le tagata e solitulafono i le tatou atunuu. E tupu le mea lena i le Maota lenei i le mataupu lea o le Peresetene o Faamasinoga o Fanua ma Suafa.

E oo mai nei, o lo o ou nofo pea ma lou faanoanoa. Na ou saofai ai i totonu o le Maota lenei lau afioga i le Fofoga Fetalai ae fai le faaiuga a le Palemene o Samoa e solofua le tagata solitulafono. Ae faitau 100, faitau 1,000 tagata Samoa la e i le falepuipui. Ese le Tulafono mo e taualoa, ese le Tulafono mo tagata lautele. O le fatu lena ua tupu i totonu o le Maota lenei. O lea foi o le a tatou toe oo i ai i le mataupu lea. A solitulafono le sui usufono, ese lava lona tulaga.

Lau Afioga i le Fofoga Fetalai ma le mamalu o le Palemene, i lou tulaga faasui usufono, i lou tulaga faataitai, ou te le talia lea amio ma lea faiga e tausolomua ai i le Palemene ma le Maota faitulafono o Samoa.

Lau afioga a le Fofoga Fetalai, mataupu mulimuli, e pei o lo o feaveai i upu ma tala, le mea lea e tupu i i. O le mea lea e tupu i i, o le faamalolo le tumau, ae e pei e faafoliga mai, o upu ma tala, pei o le faamuta le tofi lea e tatou te talanoa i ai.

Lau afioga i le Fofoga Fetalai, taatia faaiuga e fia i le Faamasinoga le la. E na o le tasi lava le malosiaga e aveese ai le sui usufono o o, Faamasinoga. A o le pulea o le Maota lenei, e gata le tatou malosia o a tatou faasalaga i le faamalolo le tumau. O lea la ua fai i ai ia le tatou faaiuga lenei.

Lau afioga i le Fofoga Fetalai, o le tualuga o sou taofi, e amata mai i le Nofoaiga lenei. O le a le pine o le le taua o le Palemene lenei ma a outou afioga i alii ma tamaitai sui usufono? O le pine ai ai o le Nofoaiga lenei, ua oo i le aso, ua faatulafonoina, e ao ona usuia ai le Fono a le Nofoaiga lona

XVII, i luga o le filifiliga a le atunuu, le Aso 24 o Me 2021. Fai mai e a le Tulafono Faavae? O le aso mulimuli lava lea, e tataua ona faatino ai le faamoemoe lea. Usuia le Fono a le atunuu i luga o filifiliga a le atunuu.

O le a le mea na tupu? Omai tatou na faasinolima i ai o tatou itumalo, loka le faitotoa lea, loka le faitotoa lea. O le Faavae o le Malo Tutoatasi o Samoa, o ona tagata. O le latou pule, saofafai ai tatou i totonu o le Maota lenei. A o le pule a ai na aveese ai le mea lea? Taofi ai sui o le atunuu? Le nofoia le Palemene lenei?

Lau afioga i le Fofoga Fetalai, amataga o le Nofoaiga lenei, na aliali mai ai, e leai se aloaia o le Palemene o Samoa. O le mea lena, lea lava e faaauau ai.

**Susuga Hon Tuilaepa Fatialofa Auelua Sailele Malielegaoi:** Lau afioga i le Fofoga Fetalai

**FOFOGA FETALAI:** Lau afioga i le Taitai o le Itu Agai, lea o le a maea le saunoaga a le Palemia ona tuu atu ai lea o le avanoa. Saunoa mai lau afioga i le Palemia.

**Afioga Hon FIAME NAOMI MATAAFA:** O lea lava e faaauau, e taatia Tulafono, e i ai tofiga o tagata, e i ai latou galuega e faatino, ae ua a? Le amanaia Tulafono na faavae ai ona o le malosi e ese atu, ae e le o se malosi e faavaeina, faale-tulafono, e pei ona finagalo i ai o outou tuua ma o matou matua, faavae le Malo lenei i le pule faale-tulafono.

Lau afioga i le Fofoga Fetalai, ou te talia le faaiuga a le Komiti, ma ou te faapea atu ai ma le faaaloalo, aumai loa le fesili, lau afioga.

**FOFOGA FETALAI:** Ia ua malo le malele...

**Susuga Hon Tuilaepa Fatialofa Auelua Sailele Malielegaoi:** Lau afioga i le Fofoga Fetalai.

**FOFOGA FETALAI:** Lau afioga i le Palemia, Taitai foi o le Maota, e tusa ai foi o le tatou mataupu ma e o le tatou toe lauga foi lea e uiga i le tatou mataupu. Ia o lea foi e tau tulai mai lau afioga, ia atonu e i ai se taimi..

**Susuga Hon Tuilaepa Fatialofa Auelua Sailele Malielegaoi:** Leai na ona ou fesili atu pe i ai se avanoa..

**FOFOGA FETALAI:** Ae ua ou manatu... ia e

**Susuga Hon Tuilaepa Fatialofa Auelua Sailele Malielegaoi:** Ona o lea o le a tatou agai tonu i le mataupu lea ou te tulai atu ai.

**FOFOGA FETALAI:** E le afaina e maua sou avanoa pe a... ua i ai le manatu o lea ua tulata ia le tatou malologa. Ua i ai le manatu o le a faataatiaese ia le tatou galuega i le taimi lenei mo lana malologa o le afiafi. E tatou te toe taliu mai toe faaauau ia le tatou galuega.

*Na faataatiaese Taulumaga a le Fono Aoa Fautulafono mo lana malologa i le itula e 4:38 seia aulia le itula e 5:12 i le afiafi.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Fautulafono.

E i ai le manatu ua matu i fau le taligasua ma le tautege a le tatou Maota. Ua maua foi se faasiligamalos i le paia o le Palemene e faaauau ai le tatou galuega i lenei afiafi. Malo le onosai.

E faataatiaese ia le tatou galuega mo le malologa ua maea saunoa le afioga i le Palemia. Na tulai mai foi le afioga i le Taitai o le Itu Agai e fia saunoa, o le mea lea ou te tapa lau afioga i le Taitai o le Itu Agai, ia tulai mai e saunoa.

**Susuga Hon Tuilaepa Fatialofa Auelua Sailele Malielegaoi:** Ia ou te tulai atu ma le agaga faaaloalo lau afioga i le Fofoga Fetalai, ona e i ai nai mataupu sa ou fia talanoa ai. Ae muamua ona momoli atu le faamalo i le Matagaluega ma le tausiga o lea ua tali le sua i le mamalu o le tatou Palemene, le Palemia ma lana Kapeneta.

O le mataupu muamua sa ou fia tulai atu ai o le talosaga lea ona o lea o le a tatou alofaiva i le faigapalota, mo se tatou palota tauvalaau. O le taua o le palota tauvalaau, e tatau ona faamau lelei ia tatou faamaumauga le aso lenei ma le faaiuga lea ua fai a le Palemene. E taua tele tatou faamaumauga, ina ia faamaumau ia le palota tauvalaau.

O le vaega lona lua, o le toe momoli o le faafetai i le upu taiala na aumai e le tatou faifeau i le taeao nei aemaise foi o le afioga i le Ao mamalu o le Malo. Sa ia faataua ai le tulaga o le nofo fealofani, aveese le faatupu vevesi, faatupu le filemu.

Ua matau mai lau afioga, ua tasi moemoe le taofi o le Itu lenei, e na o le afioga i le Sui Taitai e na te avatua so matou taofi i le agaga o le feoeoeai. Ua matou aloaloese lava, i le tulaga o le talanoa o mataupu i faasalaga e ui ina saunoa manino le afioga i le Palemia, o le taimi lenei e tatala ai. O mea uma sa o matou fia talanoa ai, e aofia ai ma faasalaga, ua uma ona o matou talanoa iai, lauga i ai sui usufono o le vaega lenei. Ia ma aumai foi ia o matou lagona. Ia sa faatoese foi ia le afioga i le sui usufono le Fetalai ia Leala i lena taimi, ae peitai lau afioga i le Fofoga Fetalai, e le i amanaia.

Ia ona o matou manatu ai lea, po o le a lava sa matou faamatalaga e avatu, ua uma ona matou iloa, ua uma ona fai ia le iuga. Ma e o le proof o lena mea, a lea sa o atu leoleo e taofi matou, taofi matou i le omai e fai le tautoga. O le mafuaaga na o matou sulufai ai i le Faamasinoga ua leai se isi auala, ona o lea ua o matou iloa, o le agaga lea i lena vaega, ia aua lava ne i o matou toe omai i totonu o le Maota lenei. O le a lava la se matou faamatalaga, se i maea ou te le i faalavelave.

**Afioga Hon Fiamē Naomi Mataafa:** Lau afioga i le Fofoga Fetalai, o se mea e fia faasao.

**FOFOGA FETALAI:** Ia malie ia lau afioga i le Taitai o le Itu Agai, ona o le Palemia ma le Faigamalo lea ua... ia se i saunoa mai lau afioga i le Palemia.

**Afioga Hon Fiamē Naomi Mataafa:** Lau afioga i le Fofoga Fetalai, ua le nanananea ia le finagalo tasi o lena Itu ia avea le Sui Taitai e fai ma sui, aua o lea lava ua toe tulai mai ia le Taitai. Ae o lou tulai atu o le mataupu e fia faasao, lea ua oo tonu lava i ai le saunoaga a le afioga i le Taitai o le Itu Agai, i le taofia o le ulufale mai i le faatautoga mo latou.

Ma o le tagi na faasaga i lau afioga i le Fofoga Fetalai. O le faitau ua tea le aso, sa tataua ona fai ai ia le faatautoga i le Tulafono. E leai se isi o outou na i ai. O le faafesili, o toe i ai lava tou tofi pe leai? O lea la na ave ai i o, aumai loa le tali i lau afioga, i, o la lava e amanaia le filifiliga a le atunuu mo outou. E ui e tou te le i usitaia Tulafono Faavae o le aso lea e tataua ona feiloai ai le Palemene.

E na o le pau lava lena i lau afioga. E faamanatu atu lena tulaga.

**FOFOGA FETALAI:** Ia faafetai, ia talitonu lau afioga i le Taitai o le Itu Agai o lea ua tatou...

**Susuga Hon Tuilaepa Fatialofa Auelua Sailele Malielegaoi:** O lea o le a faamaea atu.

**FOFOGA FETALAI:** Ia ne i see mamao foi le saunoaga, ae o lea ua o tatou i ai i totonu o le lio e faamaea ai ia le tatou mataupu. E pau lava lea o le mea ou te fia taua, i le faafogafoaga mai a Samoa, e leai lava ia sa matou tala. O le mafuaaga lea, olo lava le fua matou faalogologo. O mea uma ia na saunoa i ai ia le Palemia, e matou te faitau eseese ai. E matua tele lava ia le matou faitau eseese, ae ua taofiofi lava ni lagona, lau afioga i le Fofoga Fetalai, ona o le tulaga lena. E matou te ava tele i lau afioga ma le faafogafoaga mai a Samoa.

O tulaga ia ua i ai ia le tatou Maota, ua matua faigata lava ona faali ia so matou manatu, faigata. Ae e le taofia ai la matou aiatatau e faaoga avanoa ia e aumai i lalo o le Faavae. O mea sa o tatou faia, a le mafai ona faaleo i totonu o le Maota leni, o lo o i ai isi auala e faaleo ai, [.....]. E leai se mea e tasi. O le a ou tautala i ai i Faavae ia i se taimi o i luma.

O le ala foi lena na ou tulai atu ai e faasao mea ia, ae ua uma ona tautala atu.

**Afioga Hon Fiamē Naomi Mataafa:** Lau afioga i le Fofoga Fetalai, o le mea e fia faasao.

**FOFOGA FETALAI:** Faafetai, ia o le avanoa lea i lau afioga i le Tamaitai Palemia, talifuaitau foi i le saunoaga a le Taitai o le Itu Agai.

**Afioga Hon Fiamē Naomi Mataafa:** Lau afioga i le Fofoga Fetalai, e sao lelei lava le saunoaga a le Taitai o le Itu Agai. E ese le taua o tatou faamaumauga. A tatou o i soligatulafono, o la ua faamau, solitulafono contempt of court. O soligatulafono i totonu o le Palemene leni...

**Susuga Hon Tuilaepa Fatialofa Auelua Sailele Malielegaoi:** Lau afioga i le Fofoga Fetalai...

**Afioga Hon Fiamē Naomi Mataafa:** Faamaonia, e le o se tala a au na fai.

**Susuga Hon Tuilaepa Fatialofa Auelua Sailele Malielegaoi:** O mea ia na afua i luga i faaleleiga ia sa fai.

**Afioga Hon Fiamē Naomi Mataafa:** E le o se tala a au na fai.

**FOFOGA FETALAI:** E manatu foi ia...

**Susuga Hon Tuilaepa Fatialofa Auelua Sailele Malielegaoi:** O faaleleiga ia sa fai, sa ma io faatasi i ai ma le afioga i le Palemia.

**FOFOGA FETALAI:** Ia se i faamaea pea ia le saunoaga a le Palemia ia faapena.

**Afioga Hon Fiamē Naomi Mataafa:** Ia lelei, a ua aumai le maliega, ia tatou talanoa i maliega aua o mea e faamaumau. O le maliega, ave i tua tagi, ave i tua tagi na, ave i tua tagi i i. E oo i le Contempt of Court, o atu ia matou loia, fai atu le Faamasinoga ua o matou malilie uma e aumai i tua. Ae o le a le tali a le Faamasinoga? E le o se mea lena a outou.

Lau afioga i le Fofoga Fetalai, te i ua molitu e foliga mai ua le mulimuli i maliega na fai.

**Susuga Hon Tuilaepa Fatialofa Auelua Sailele Malielegaoui:** Lau afioga i le Fofoga Fetalai, a pe a malie lou finagalo, taatia ai mea faapea.

**Afioga Hon Fiamē Naomi Mataafa:** Leai na faatino.

**Susuga Hon Tuilaepa Fatialofa Auelua Sailele Malielegaoui:** Taatia ai mea faapea. Ua uma o le a toe faaauau ia le tatou Fono ou te fia tali atu foi i mea ia.

**FOFOGA FETALAI:** Ia ua i ai foi le manatu o le Nofoa, ia ua tatau foi ona... faafetai i lau afioga i le Palemia ma lau afioga i le Taitai o le Itu Agai ia e talitonu foi, ia ua tatau ona faamaea ai i i lea vaega e pei ona tausiligia foi ma tau talanoaina ona o le manatu lava ia maua le toamalie o le tatou Palemene.

O le mea lea lau afioga i le Minisita, tulai maia lau afioga i le Minisita, lau afioga i le Taitaifono, pe a faapea e i ai se mea e te fia saunoa i ai.

**Afioga Hon VALASI LUAPITOFANUA TOOGAMAGA TAFITO SELESELE:** Ua sola manatu sa tau faauma ai se lagona. Ua lava ma toote saunoaga a le Taitai. O lea foi ua faalogologo manino lava i le tele o saunoaga, e leai lava ni mea o lagalaga. Ae faafetai i sui usufono o lo o fitoitonu i ai ia lenei lipoti, malo faafetai. Faamalo mo le tali mai, aemaise foi le aloaia o le Komiti. Ia e momoli atu ai le agaga faafetai ma le faamalo aemaise foi ia lenei Palemene, ma latou sa lagolagoina tulaga uma.

Ia o le tali atu lea i lau afioga mo le faasaoina o le taimi, faamanuia le Atua i lenei afiafi.

**FOFOGA FETALAI:** Malo faafetai mo le saunoaga.

**Susuga Hon Laauli Leuatea Polataivao Fosi:** Lau afioga i le Fofoga Fetalai...

**FOFOGA FETALAI:** Tulai mai lau afioga i le Minisita o Faatoaga ma Faigafaiva...

**Susuga Hon Laauli Leuatea Polataivao Fosi:** O si mea laitiiti lava lea ae le i aumaia ia le fesili e ala i le tatou lafo. Ou te tulai atu, *E faaui i tua upu ia, i le le sao o saunoaga uma na saunoa i ai le Palemia*, leaga o lea ua pine faamaoniga o le Faamasinoga ua faamaonia le contempt of court. Ua

pine le taeao lenei, ua faamaonia le contempt of Parliament. E leai la se mea e le sao o i i.

Lau afioga, ua ou tulai atu e aveese upu ia ma faamaumauga a le tatou Fono, e le sagatonu, e le sao e le faamaoni.

**Susuga Hon Tuilaepa Fatialofa Auelua Sailele Malielegaoi:** Lau afioga i le Fofoga Fetalai...

**Susuga Hon Laauli Leuatea Polataivao Fosi:** E le sao e le faamaoni.

**Susuga Hon Tuilaepa Fatialofa Auelua Sailele Malielegaoi:** e i ai le mea ou te fia faauilavea ai.

**Susuga Hon Laauli Leuatea Polataivao Fosi:** E pei o le ala lea o lou tulai atu, ina ia manino lelei ma malamalama le tulaga lea ne i taitaiseseina pea Samoa.

**FOFOGA FETALAI:** Faafetai, ua lelei.

**Susuga Hon Tuilaepa Fatialofa Auelua Sailele Malielegaoi:** Lau afioga ou te fia faauilavea ai...

**FOFOGA FETALAI:** Malie mai..

**Susuga Hon Laauli Leuatea Polataivao Fosi:** E le i lava le taeao lenei, e le i lava le taeao lenei. O le a fai pea i fea ia le tafutafu afi ma le faatupu vevesi o lea e tapuai le atunuu. E le i fua se tapu?

**Susuga Hon Tuilaepa Fatialofa Auelua Sailele Malielegaoi:** Se ua tele lou le mafaufau. Ua tele lou le mafaufau.

**FOFOGA FETALAI:** Malie ia le Minisita...

**Susuga Hon Laauli Leuatea Polataivao Fosi:** Lau Afioga i le Fofoga Fetalai, o lau lafo lena..

*Faaluaina e le Minisita mo le Soifua Maloloina ma le Minisita mo Galuega, Felauaiga ma Atinae Eseese.*

*Na faamaonia le lafo.*

**FOFOGA FETALAI:** O le mea lea ua faatonuina le Failautusi e tuueseina ia upu ia.

Ia o lea ua o tatou taunuu mai i le siui o le tatou mataupu, ia ae o lea ua i ai le finagalo lea na tuuina mai e le Taitai o le Itu Agai ina ia faia ia se tatou Palota Tauvalaau.

Ia ou te tapa lau Afioga i le Sui Fofoga Fetalai.

[Upu na faatonuina e le Fofoga Fetalai e aveese mai Faamaumauga o Saunoaga a le Taitai o le Itu Agai – *“Ina ia silafia e le atunuu lenei, leai se mea e tasi o mea ia na saunoa i ai ia Fiamē e sao.”*]

**Afioga AUUAPAAU MULIPOLA ALOITAFUA MULIPOLA:** Lau afioga i le Fofoga Fetalai, faafetai tele mo le avanoa lau afioga i le Fofoga Fetalai. E leai se agaga e faalavelaveina ia Tualumaga a le tatou Maota, e pau lava lea, o lea o le a alo atu lau afioga mo le sailia o le faamaoniga o le Fono Aoaofaitulafono, Lipoti a le Komiti o Tulaga Aloaia ma Amio Tualoa.

Ae ua lagona se leo o lenei itumalo ona o le talitonuga, e tatau ona saoloto le faiga e sailia ai le faaiuga a le Maota lenei. O le agaga o le manatu, ia faia le filifiliga saoloto a le sui usufono mamalu lava ia i lona talitonuga, o le faaiuga amiotonu foi lea i le Maota lenei ma lenei mataupu.

O lea ou te faatu atu ai le lafo, *Ina ia faataatiaese le tuuina mai o le Fesili a lau Afioga, ae faatino se tatou palota faalilolilo e saili ai finagalo saoloto o sui usufono mamalu o le Palemene mo se faaiuga o le tatou mataupu. Ua ou manatu o se faiga manino ma le amiotonu lea, ae o aga foi ia faa-Temokarasi.*

Ia o le lafo lea ma le faaaloalo i lau Afioga.

*Faaluaina e le Minisita mo Faatoaga ma Faigafaiva ma le sui usufono mo Salega 1.*

**FOFOGA FETALAI:** O lea ua faalua le lafo ma o le a tuuina atu loa le Fesili.

**Susuga Hon Tuilaepa Fatialofa Auelua Sailele Malielegaoi:** Se i faamolemole lava lau Afioga, se i silasila ane i le Tulafono Tumau Vaega 94.

*Na faamaonia le lafo.*

**FOFOGA FETALAI:** Ia o lea ua faamaonia le lafo, ma o lo o manino lava le agaga o le lafo, ia faatino se palota faalilolilo ina ia tuliloa ai le filifiliga saoloto faitoatasi a le sui usufono mamalu i lona talitonuga o le

faaiuga amiotonu lea o lenei mataupu. O le mea lea, o le a tatou saili lava se faaiuga amiotonu o lenei mataupu.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ou te tapa lava, se i faitau mai lava le Vaega 94 o le Tulafono Tumau.

**FOFOGA FETALAI:** Ia, ou te faamalie atu i le Taitai o le Itu Agai, o le lafo lea na faatu ma o lea ua faaluaina ma ua uma ona ioeina e le Palemene. O le mea lea...

**Susuga Hon Tuilaepa Fatialofa Auelua Sailele Malielegaoi:** O le mafuaaga lena na ou tulai atu ai lau Afioga, ona o le 94 lea e matua manino lava, a talosaga se Palota Tauvalaau e so o se sui usufono, o le a tapa loa e le Fofoga Fetalai le Failautusi e ta le logo e lua ma valaau mai sui usufono i totonu, e leai se lafo e faia. Ae afai ua e finagalo tatou te alu sese ai pea faapea, ona mau ai lea i totonu o tatou Tulafono Tumau, o le isi lea au faaiuga ua soli ai tatou Tulafono Tumau.

**FOFOGA FETALAI:** O lo o manino lava a tatou Tulafono Tumau, e le i oo foi i le taimi e ta ai le logo, o lea e le i oo atu le faasilasilaga a le Fofoga Fetalai. O le mea lea, ia lavapapale mai pea lau Afioga i le Taitai o le Itu Agai, o lo o faasolosolo atu pea ma tatou oo i le logo lea e pei ona taua.

O le mea lea o le a tatou saili lava se faaiuga amiotonu o lenei mataupu. E i ai le manatu, ia o le a saili lava i sui usufono mamalu o lo o auai i le Fonotaga i le aso lenei le aofai e lagolagoina pe teena le fautuaga ua fautuaina e le Komiti mo se faaiuga a le Fono Aoaofa Faitulafono.

Ma ou te faatonuina le Failautusi ina ia ta le logo mo se minute e tasi e valaau ai sui usufono o lo o i fafo ina ia afifio mai.

*Na faatonuina e le Fofoga Fetalai le Failautusi ina ia ta le logo.*

**FOFOGA FETALAI:** Ou te faatonuina foi le Failautusi a o ta le logo ia tapena le faatinoga o le palota faalilolilo a le tatou Maota.

Ia, o lea ua logo mai au e le Failautusi e 48 sui usufono mamalu o lo o i totonu o le Maota. O le faiga o le tatou Palota, o le a auauai mai sui usufono mamalu i le autafa lea e fai ai lau palota, ia faitau malamalama le faatonuga o lo o i luga o le Pepa Palota.

E na o le lua lava Fesili o lo o i le Pepa Palota:

- 1. Lagolagoina le Lipoti a le Komiti; ma le**
- 2. Teena le Lipoti a le Komiti.**

O fea lava le Fesili e te lagolagoina, ona maka lea o le pusa i autafa ane. Faamolemole, aua ne i tusia fua lou Suafa i lau pepa palota, na o le maka lava o le Fesili e te finagalo i ai.

O le faasologa o le faiga o le palota, o le a faasolo i le lisi o Suafa o le a ou tolaulauina atu. A valaau atu lou Suafa ona e afio mai lea i le laulau a le Failautusi e tuuina atu i ai lau pepa palota, ona e talaaao lea i le laulau lea i autafa e faatino ai lau palota. A maea ona fai lau palota, gagau lau pepa palota ma tuu i le pusa palota o lo o i luga o le laulau a le Failautusi.

Ia, saunoa mai lau Afioga i le Palemia.

**Afioga Hon Fiamē Naomi Mataafa:** Ia, ona ua tatou o lava i luga o Tulafono Tumau. O lo o sii mai e le Afioga i le Taitai o le Itu Agai le 94, ae o le vaai atu i le 93 i le faatinoga o a tatou palota i le (6) o lo o faapea mai ai, e le mafai e se sui usufono ona palota i so o se mataupu e i ai sana aia tuusao tau tupe, ma afai e palota o ia i se mataupu faapena, e mafai ona faaleaogaina lana palota i luga o se lafo faatu, vagana ai tuutuuga o lenei parakalafa, o sui usufono uma o lo o auai i totonu o le tuaoi o le potu fonu o le taimi e fai ai palota, e tataua lava ona palota i le faiga palota.

Ua ala ona ou laga le mataupu lea, ona o lea e i lalo o le fautuaga a le Komiti aiaiga o le faamalolo le tumau o le Afioga i le sui usufono o Lepa ma le sui usufono o Faleata 3, i le tulaga foi lea i le le maua o totogi, mataupu tau tupe.

Ia na o le avatu pea faafesili i lau Afioga, aua e ono faia le la palota e tetee ona o le a le maua o la totogi. Ia, ua tele lava mea aoga ua tulai mai i le tatou mataupu, ae fesili atu pea i lau Afioga pe fai pea ia le tatou palota ae palota laua.

**FOFOGA FETALAI:** Ia o le faafesili a lau Afioga i le Tamaitai Palemia...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia se i fai atu pea se tala ona saunoa ai lea o lau Afioga. E i ai pea le avanoa o laua e fai ai pea le la palota. O le agaga lena ma le faaaloalo i lau Afioga i le Palemia mo le faafesili.

Ia o le a lau le tatou lisi...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai a o le i faia le tatou palota, o lea sa ou tulai atu i le 94. O lena e te silafia, o le 94 a uma loa ona tatagi le logo, ona valaau mai loa lea o i latou e lagolagoa le lafo tutu i luga ona faitau mai lea ma nofo i lalo, faafogafoga mai Samoa. Ia o latou e tetee, matou tutu i luga. O le 94 lea na

ou talanoa atu ai, ae ese le mea lea ua fai. Afai e le mafai ona fai le 94, ou te talosaga ina ia fai, ae pe i ai se auala e mafua ai ona le faia.

**FOFOGA FETALAI:** Ia ua tele lava atu fesili i le tatou palota, o lea foi sa taumafai atu le fesili ae faatu mai foi i le palota tauvalaaui. A ua manatu lava le Nofoa ia i tulaga amiotonu, ma se i saili le amiotonu o sui usufono mamalu taitoatasi. O le agaga lena ua mafua ai ona talia e le Nofoa le lafo na faatu mai e le Sui Fofoga Fetalai ae lagolagoina e le Minisita o Faatoaga. E le o se faaiuga la na fai atu i luga o le Fofoga Fetalai, a o le faaiuga o le palota o lea ua uma ona ioeina e le Palemene.

O le mea lea, tatou malilie o le a faaoga pea le palota lea faalilolilo ina ia saoloto ai pea sui usufono mamalu mo le latou palota. O le mea lea o le a tolaulau le tatou lisi. Amata mai i lau Afioga Hon Fiamē Naomi Mataafa. Ia se i siaki muamua le tatou pusa po o i ai ni mea i totonu. Aua le toia le va sui usufono mamalu.

### **PALOTA TAUVALAAU**

1. Hon Fiamē Naomi Mataafa.
2. Hon Tuala Tevaga Iosefo Ponifasio.
3. Hon Laauli Leuatea Polataivao Fosi.
4. Hon Olo Fiti Afoa Vaai.
5. Hon Leatinuu Wayne Sooalo.
6. Hon Valasi Luapitofanua Toogamaga Tafito Selesele.
7. Hon Faualo Harry Jeffrey Schuster.
8. Hon Matamua Seumanu Vasati Sili Pulufana.
9. Hon Seuula Ioane.
10. Hon Toelupe Poumulinuku Onesemo.
11. Hon Toeolesulusulu Cedric Pose Salesa Schuster.
12. Auuapaau Mulipola Aloitafula Mulipola.
13. Manuleleua Paletasala T. Tovale.
14. Masinalupe Makesi Masinalupe.
15. Toomata Norah Leota.
16. Tagaloatele Pasi Poloa.
17. Niuava Eti Malolo.
18. Tea Tooala Peato.
19. Fepuleai Faasavalu Faimata Sua.
20. Laumatiamanu Ringo M. Purcell.
21. Seuamuli Fasi Toma.
22. Fesolai Apulu Tusiupu Tuigamala.
23. Fuiono Tenina Crichton.
24. Agaseata Valelio Tanuvasa Peto.

25. Magele Sekati Fiaui.
26. Maiava Fuimaono Tito Asafo.
27. Faleomavaega Titimaea Tafua.
28. Hon Tuilaepa Fatialofa Auelua Sailele Malielegaoi.
29. Hon Lauofo Fonotoe Nuafesili Pierre Lauofo.
30. Hon Tapunuu Niko Lee Hang.
31. Hon Sala Fata Pinati.
32. Hon Lautafi Fio Selafi Purcell.
33. Hon Loau Solamalemalo Keneti Sio.
34. Hon Faimalotoa Kika Stowers Ah Kau.
35. Hon Tuuu Anasii Leota.
36. Lealailepule Rimoni Aiafi.
37. Lenatai Victor Faafoi Tamapua.
38. Peseta Vaifou Tevagaena.
39. Leaana Ronnie Posini.
40. Sulamanaia Fetaiai Tauiliili Tuivasa.
41. Ale Vena Ale.
42. Fuaava Suluimalo Amataga.
43. Lupematasila Galumalemana Tologata Togia Tile Leia.
44. Aiono Tile Gafa.
45. Maulolo Tavita Amosa.
46. Aliimalemanu Moti Momoemausu Alofa Tuuau.
47. Faagasealii Sapoia Feagiai.
48. Foisala Lilo Tuu Ioane.

<b>O E na Lagolagoina le Lipoti</b>	-	<b>29</b>
<b>O E na Teena le Lipoti</b>	-	<b>19</b>

**FOFOGA FETALAI:** O lea ua maea faatino a tatou palota. Ma o le laasaga o le a sosoo ai o le faitauina o le palota. Ou te tapa lau Afioga i le Sui Taitai o le Itu Agai e fai ma sui o lea Itu e te afio mai i luma o le laulau a le failautusi, mo le mataituina o le faitauga o le palota. Ou te tapa foi lau Afioga i le Sui Palemia, ina ia afio mai i luma o le laulau e mataituina le faitauina o le tatou palota. Ma le agaga faaaloalo.

Ou te faatonuina le Failautusi mo le amatalia o le faitauga o le palota.

E momoli atu le faafetai i lau Afioga i le Sui Palemia, ma lau Afioga i le Sui Taitai o le Itu Agai mo le mataituina o le faitauga o le tatou palota i lenei afiafi. O lea ua ou taulimaina le faaiuga o le palota.

O le aofai o i latou e lagolagoina le lipoti a le Komiti, e 29. O le aofai o i latou e teena le lipoti a le Komiti, e 19.

E tusa ai o le taunuuga o le palota faalilolilo sa faatinoina e saili ai se faaiuga a le Fono Aoaofa Faitulafono. O lea ou te faasilasila atu ai, ua

faamaonia nei e le Fono Aoao Faitulafono le lipoti a le Komiti o Tulaga Aloaia ma Amio Taualoa faatasi ma le fautuaga ua tuuina mai.

E tusa ai ma tulaga aloaia o le tatou Palemene, o le aso fono lava lenei e aloaia ai le faaiuga a le Fono Aoao Faitulafono i lenei mataupu. E tusa ai foi ma tatou Tulafono Tumau, e le faatagaina se saunoaga i se mataupu ua maea ona faia i ai le faaiuga a le tatou Maota.

O le mea lea ou te tapa sui usufono mamalu, lau Afioga i le Taitai o le Itu Agai ma le sui usufono mo Faleata Nu. 3, ina ia tuua loa lo tatou Maota.

**Afioga Hon FIAME NAOMI MATAAFA:** Lau Afioga i le Fofoga Fetalai.

**FOFOGA FETALAI:** Ia saunoa mai lau Afioga i le Palemia.

### LAFO MO LE TOLOPOINA

**Afioga Hon FIAME NAOMI MATAAFA:** Lau Afioga i le Fofoga Fetalai ua matauina le faagasologa o galuega o lenei aso. Ae ua ou tulai atu e tusa ma le lafo na faatu analeila, e faasino lea ia tatou itula Fono mo le aso, na faapea ai tatou te malolo i le itula e 7:00 i le afiafi.

Ua manatu lau Afioga i le Fofoga Fetalai, pe ua talafeagai foi le faia o se malologa a le Maota. Ua mavae atu foi se tasi o mataupu sa alo atu i ai le Maota, ae tatou alafai mai i le taeao fou e faaauau le tatou galuega. O le lafo lea, *Ina ia suia le tatou itula malolo mai le 7:00 i le afiafi i le taimi lenei i le finagalo ai o lau Afioga.*

*Faaluaina e le Sui Palemia, ma le Minisita mo Pisinisi ma Alamanuia.*

*Na faamaonia le lafo.*

**FOFOGA FETALAI:** E avatu le faamalo a le Nofoa mo lenei aso i le paia o le Maota i le faafeagai foi ma taualumaga o le tatou fono. Atonu foi o se tasi foi o laasaga fou le faatinoina o le tatou palota faalilolilo, o lea ua faatino. E faafetai tele lava i le lavapapale o le tatou Maota, mo galuega uma o lenei aso, o lea ua faatino. Ou te talitonu foi ua tatau foi ona fai se tatou malologa, taeao aena foi saili lo outou malosi.

O le mea lea ou te tapa ma le agaga faaaloalo, lau Afioga i le Minisita o Faamasinoga Matamua e faaiu mai le tatou Fonotaga i se tatalo.

*Na tolopo Taualumaga a le Fono Aoao Faitulafono i le itula e 6:15 i le afiafi, seia aulia le itula e 9:30 i le taeao o le Aso Lulu, 19 Oketopa 2022.*